

**PCM Buat Laporan SPRM Terhadap Tuntutan Caj Rawatan Md Sabu
Bernama
29 Ogos 2011**

GEORGE TOWN, 29 Ogos (Bernama) -- Parti Cinta Malaysia (PCM) hari ini membuat laporan Suruhanjaya Pencegahan Rasuah Malaysia (SPRM) bagi menyasat tuntutan caj rawatan hospital timbalan presiden PAS Mohamad Sabu daripada Perbadanan Bekalan Air Pulau Pinang Sdn Bhd (PBAPP).

Naib Presiden PCM Huan Cheng Guan berkata siasatan itu perlu dilakukan oleh SPRM kerana terdapat keraguan dalam tuntutan bayaran kos perubatan yang dilaporkan berjumlah RM8,434.05 sedangkan kos rawatan sebenar di Hospital Pakar KPJ di Selangor itu adalah sebanyak RM5,060.54 sahaja.

Katanya, selain itu tindakan Mohamad didakwa telah menyalahguna kedudukannya sebagai Anggota Lembaga Pengarah perbadanan itu apabila membuat tuntutan berkenaan.

"Mat Sabu sebagai seorang bekas Ahli Parlimen layak untuk menerima rawatan kelas pertama di wad hospital kerajaan dan beliau telah membazir wang rakyat," katanya kepada pemberita selepas menyerahkan laporan itu kepada SPRM di sini hari ini.

Beliau berkata PCM berharap SPRM menjalankan siasatan terhadap semua keraguan, kelayakan, cara tuntutan termasuk menyasat Ketua Menteri Pulau Pinang Lim Guan Eng sebagai Pengerusi PBAPP kerana meluluskan tuntutan itu.

Huan berkata Mat Sabu didakwa menerima rawatan dari hospital swasta berkenaan akibat kecederaan ketika terlibat dalam perhimpunan haram di Kuala Lumpur pada 9 Julai lepas dan tiada kaitan langsung ketika menjalankan tugas untuk PBAPP.

Mohamad dilaporkan telah menerima bayaran balik perbelanjaan perubatan daripada PBAPP baru-baru ini.

Baru-baru ini Ketua Penerangan Pemuda Umno Datuk Reezal Merican Naina Merican mendedahkan mengenai tuntutan kos rawatan Mohamad yang didakwa sebagai menyalahguna kedudukannya sebagai Anggota Lembaga Pengarah PBAPP dengan membuat tuntutan perubatan akibat kecederaan semasa menyertai perhimpunan haram Bersih 2.0 di Kuala Lumpur Julai lepas.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=610948>